



KEMENTERIAN EKONOMI
JABATAN PERANGKAAN MALAYSIA

KENYATAAN MEDIA

MYAGRISTATS 2024: STATISTIK PERTANIAN DAERAH SABAK BERNAM, KLUANG DAN BANDAR BAHARU

Sabak Bernam: 7.0 Ribu Hektar Keluasan Bertanam Kelapa Gerakkan Ekonomi Selangor

PUTRAJAYA, 6 Julai 2026 – Jabatan Perangkaan Malaysia (DOSM) hari ini mengumumkan penerbitan MyAgriStats 2024 bagi tiga daerah pentadbiran terpilih iaitu Sabak Bernam (Selangor), Kluang (Johor) dan Bandar Baharu (Kedah). Tiga daerah ini merupakan fasa pertama penerbitan MyAgriStats, dan liputan akan diperluaskan secara berperingkat kepada daerah-daerah pentadbiran lain di seluruh negara bagi melengkapkan gambaran statistik pertanian peringkat daerah. Laporan ini menghimpunkan statistik utama aktiviti subsektor Tanaman, Ternakan, Perikanan Tangkapan, Akuakultur serta Perhutanan & Pembalakan di daerah terbabit.

Statistik yang dibentangkan dalam penerbitan ini adalah hasil penyusunan data sekunder daripada sumber pentadbiran agensi teknikal berkaitan sektor pertanian, iaitu Jabatan Pertanian, Jabatan Perkhidmatan Veterinar, Jabatan Perikanan dan Jabatan Perhutanan. Data ini disusun semula, disemak dan diintegrasikan dengan penerbitan DOSM yang lain bagi memastikan laporan yang bersepadu di peringkat daerah.

Ketersediaan statistik pertanian sehingga peringkat daerah akan memberi manfaat kepada agensi kerajaan dan pengusaha pertanian dalam merangka perancangan yang lebih bersasar serta memastikan agihan sumber yang berkesan. Keputusan strategik dalam pemilihan bidang pertanian yang berpotensi haruslah dibuat dengan betul serta berasaskan bukti dan fakta yang menyeluruh dan mencukupi bagi mengukuhkan keterjaminan makanan negara.

Penerbitan ini bertujuan untuk dijadikan sumber rujukan tambahan bagi membantu pengusaha pertanian merancang strategi pengeluaran dan pemasaran hasil pertanian. Di samping itu, penerbitan ini dapat membantu dalam membuat keputusan yang lebih tepat dan strategik dalam mengenalpasti produk pertanian yang berpotensi di ketiga-tiga daerah terpilih.

Di daerah Sabak Bernam, Selangor, tanaman kelapa jelas mendominasi keluasan bertanam daerah dengan 7.0 ribu hektar, menghasilkan 105.0 ribu tan metrik bernilai RM169.1 juta. Cili merah

menyusul dengan nilai pengeluaran RM9.4 juta (1,000.0 tan metrik daripada keluasan 40.0 hektar), diikuti pisang yang bernilai RM8.2 juta (4,000.0 tan metrik daripada keluasan 250.0 hektar).

Perikanan Tangkapan Laut turut menonjol di Sabak Bernam. Senangin merekodkan pengeluaran tinggi sebanyak 1.4 ribu tan metrik bernilai RM38.1 juta, udang putih/kertas besar menyusul dengan mencatatkan 0.9 ribu tan metrik yang bernilai RM50.6 juta, dan bawal tambak dengan 0.7 ribu tan metrik bernilai RM49.2 juta. Bagi sektor Akuakultur, tilapia merah menjadi hasil utama (2,050.5 tan metrik bernilai RM19.5 juta), diikuti udang harimau (804.2 tan metrik bernilai RM28.9 juta) dan udang putih (75.2 tan metrik bernilai RM2.1 juta).

Beralih ke daerah Kluang, Johor, tanaman nanas muncul sebagai penyumbang terbesar dengan nilai pengeluaran RM363.4 juta (149.6 ribu tan metrik), diikuti durian bernilai RM98.0 juta (5.1 ribu tan metrik) dan sawi yang bernilai RM27.4 juta (7,000.0 tan metrik). Aktiviti Perikanan Tangkapan Darat di Kluang pula tertumpu kepada ikan temperas (103.4 tan metrik bernilai RM413.5 ribu), ikan baung (53.2 tan metrik bernilai RM958.2 ribu) dan udang galah (50.7 tan metrik bernilai RM2.5 juta). Sektor Akuakultur di Kluang pula diterajui penternakan ikan hiasan menerusi Malaysian Golden Arowana dengan nilai pengeluaran RM4.3 juta (9.6 ribu ekor), diikuti tilapia merah (191.7 tan metrik bernilai RM2.3 juta) dan ikan keli (87.3 tan metrik bernilai RM453.2 ribu).

Di daerah Bandar Baharu, Kedah, durian menjadi tanaman utama dengan nilai pengeluaran RM131.8 juta (6.9 ribu tan metrik), diikuti nanas (1.3 ribu tan metrik bernilai RM3.3 juta) dan manggis (349.1 tan metrik bernilai RM1.9 juta). Aktiviti tangkapan sungai dalam Perikanan Tangkapan Darat melibatkan ikan terbul (35.5 tan metrik bernilai RM212.8 ribu), udang galah (19.3 tan metrik bernilai RM1.3 juta) dan ikan baung (18.1 tan metrik bernilai RM725.4 ribu). Sektor Akuakultur pula memberi fokus kepada ikan keli sebanyak 1.4 ribu tan metrik bernilai RM8.3 juta, tilapia merah (72.8 tan metrik bernilai RM945.9 ribu) dan ikan hiasan Golden Arowana (Highback) sebanyak 455.0 ekor bernilai RM36.4 ribu.

Dari segi sumbangan ekonomi, sektor pertanian terus memberi sumbangan signifikan kepada Keluaran Dalam Negeri Kasar (KDNK) di peringkat daerah terpilih. Pada tahun 2020 (harga malar), sektor pertanian di Kluang menyumbang sebanyak RM3,575 juta, diikuti oleh Sabak Bernam (RM918 juta) dan Bandar Baharu (RM272 juta).

Ketua Perangkawan Malaysia, Dato' Sri Dr. Mohd Uzir Mahidin berkata, *"Data ini adalah hasil kerjasama erat pelbagai agensi teknikal iaitu Jabatan Pertanian, Jabatan Perkhidmatan Veterinar, Jabatan Perikanan dan Jabatan Perhutanan. Saya berharap maklumat terperinci ini dapat dimanfaatkan sepenuhnya oleh semua pihak bagi memperkukuh keterjaminan makanan negara."*

MyAgriStats 2024 boleh dimuat turun secara percuma di portal rasmi Jabatan Perangkaan Malaysia <https://tanistats.dosm.gov.my/>.


Jabatan Perangkaan Malaysia (DOSM) sedang melaksanakan **Banci Ekonomi 2026 (BE2026)** dengan tema “Data Nadi Ekonomi Rakyat”. Pelaksanaan Banci Ekonomi kali keenam ini berlangsung dari 5 Januari hingga 31 Oktober 2026. BE2026 bertujuan untuk mengumpul data yang menyeluruh dan berstruktur daripada semua pertubuhan perniagaan berdaftar dan tidak berdaftar di Malaysia, bagi menilai prestasi, struktur serta ciri-ciri ekonomi negara secara komprehensif dan berasaskan bukti.

Malaysia buat julung kalinya telah menduduki **tangga pertama (1)** di peringkat global dalam laporan dwitahunan **Open Data Inventory (ODIN) 2024/25** yang dikeluarkan oleh Open Data Watch (ODW), mengatasi 197 negara lain. Pencapaian ini merupakan lonjakan ketara daripada kedudukan ke-67 dalam penilaian ODIN 2022/23.

OpenDOSM NextGen adalah medium yang menyediakan katalog data dan visualisasi bagi memudahkan pengguna menganalisis pelbagai data dan boleh diakses melalui portal www.open.dosm.gov.my.

Paparan 1: Nilai pengeluaran Tanaman, Perikanan Tangkapan & Akuakultur (RM juta) mengikut aktiviti utama, Sabak Bernam, Selangor, 2023


Sabak Bernam, Selangor



Sumber: Jabatan Perangkaan Malaysia (DOSM)

Paparan 2: Nilai pengeluaran Tanaman, Perikanan Tangkapan & Akuakultur (RM juta) mengikut aktiviti utama, Kluang, Johor, 2023


Kluang, Johor



Sumber: Jabatan Perangkaan Malaysia (DOSM)

Paparan 3: Nilai pengeluaran Tanaman, Perikanan Tangkapan & Akuakultur (RM juta) mengikut aktiviti utama, Bandar Baharu, Kedah, 2023

Bandar Baharu, Kedah



Sumber: Jabatan Perangkaan Malaysia (DOSM)

Dikeluarkan oleh:

PEJABAT KETUA PERANGKAWAN MALAYSIA
JABATAN PERANGKAAN MALAYSIA
6 JULAI 2026